

Powšitkowne WOZJEWJENJA

njedźelu, 16. nowembra 2025

Wustajeńca wo nabožnych hrach

W Chróšćanskim Hórnikowym domje wotewrja tutu njedźelu, 16. nowembra, po nyšporje, kotryž so w 14.00 hodź. zahaji, wustajeńcu wo nabožnych hrach, kotrež buchu w Serbach wot 1877 do 2025 předstajane. Jurij Špitank je ju w nadawku Towarstwa Cyrila a Metoda z.t. (TCM) zestajał. Wona budže hač do srjědź decembra stajnje njedźelu po nyšporje hač do 17.00 hodź. přistupna. Wodźenja zwonka toho časa móža zajimcy pola Jurja Špitanka pod telefonowym čislom (01 72) 7 97 38 29 skazać.

Nazymski koncert z „Jarobinku“

Posledni lětuši nazymski koncert budže wutoru, 18. nowembra, w 19.00 hodź. na awli Šule Ćišinskeho w Pančicach-Kukowje. Wuhotuje jón žónski ansambl „Jarobinka“ pod nawodom Walburgi Wałdžic. Wšitcy zajimcy su wutrobnje přeprošeni.

TCM prosy na škot a rommé

Sekcija Swójba Towarstwa Cyrila a Metoda z.t. (TCM) přeprošuje wšitkich zajimcow na škotowy turněr, kotryž wuhotuje wona wutoru, 18. nowembra, na předwječoru pokutneho dnja, we 18.30 hodź. w Jasčanskej „Bjesadze“. Wuraznje su nimo muži tež žony přeprošene, wšojedne kotreje staroby. Za tych, kotřiž njemóža škot hrać, zarjaduja zdobom turněr z kartowej hru rommé. Myta ma TCM za dobyćerjow wobeju turněrow spřihotowane. Wobdźělenje je za wšitkich darmotne. Wo zastaranje z jědžu a napojemi so TCM postara.

Nyšpor k jubilejej při swjatołětnym pomniku

Składnostnje poswjećenja pomnika swjateju Cyrila a Metoda pola Stróžišća před 25 lěta přeprošuje mějicel, Towarstwo Cyrila a Metoda z.t. (TCM), wěriwych ze wšěch wosadow na nyšpor na tutym městnje. Wón budže na swjedženju Chrysta Krala, njedźelu, 23. nowembra, w 14.00 hodź. Po tym su wšitcy na swačinu do Smochčanskeho kubłanišća swjateho Bena přeprošeni.

Koncertw klóšterskej cyrkwi

Komorny chór nota bene leipzig pod nawodom profesora Martina Krumbiegela wuhotuje njedźelu, 23. nowembra, w 17.00 hodź. koncert w klóšterskej cyrkwi w Pančicach-Kukowje. Zaklinča mjez druhim twórba „Musicalische Exequien“ Heinricha Schützka kaž tež kruchi dalších komponistow 17. do 21. lěstotka. Zastup je darmotny, wo dary proša.

Chrysta krala w Chróšćicach

Na zhromadny nyšpor je dekanatna młodžina tež lětsa na swjedženju Chrysta Krala, njedźelu, 23. nowembra, do Chróšćic prošena. Započatk je w 14.00 hodź. z nyšporom w cyrkwi. Přizamknje so přednošk Wjenkec Haliny a Chrystofera wo teologii mandželstwa z wosobinskim swědčenjom.



Zetkanje samostejacych

Samostejacy ze serbskich wosadow su na swoje lětuše poslednje zetkanje wutoru, 2. decembra, w 14.00 hodź. do Smochčanskeho kubłanišća swjateho Bena přeprošeni. Zajimcy njech so hač do wutory, 25. nowembra, w redakciji Katolskeho Posoła přizjewja, telefonowe čisło (0 35 91) 55 02 12. Dalši zajimcy, kotřiž njejsu samostejacy, su tohorunja wutrobnje witani. Kóždy njech sej Wosadnik sobu přinjese. Štóz chce wotewzaty być, njech to prošu zdžěli.

Džělowe městno pola Katolskeho Posoła

Towarstwo Cyrila a Metoda z.t. pyta wosobu, kotraž by wot 1. januara 2026 redakciski team Katolskeho Posoła zesylniła. Njejedna so wo přidatne džělowe městno, ale wosoba sej džělowe městno ze sobudželačerku džěli. Džělowy čas wučinja 20 hodźin wob tydzeń. Wuměnenja za přistajenje su nimo wuznaća k wěrje a wučbje romsko-katolskeje cyrkwy wotzamknjene powołanske wukubłanje, zakładne znajomosće na polu katolskeje nabožiny, jara dobre znajomosće serbskeje rěče, stawiznow a kultury, po móžnosći znajomosće rěče, stawiznow a kultury druhich słowjanskich krajow, znajomosće na polu žurnalizma, sadžby (Adobe InDesign), we wobdžělanju wobrazow (Adobe Photoshop), programow Microsoft Office kaž tež FinanzManagera respektiwnje zwólniwosć, sej tole w krótkim času přiswojić. Wukonjeć maja so tohorunja z pomocu kompjuterowych programow zarjadniske nadawki. Mzda płaći so po tarifowym zrěčenju za zjawnostnu službu (TVöD). Zajimcy měli so hač do pónđzele, 1. decembra, pola Towarstwa Cyrila a Metoda z.t., Póstowe naměsto 2, 02625 Budyšin, abo na mailowu adresu TCM@Posol.de pisomnje wo městno požadać. Tam zhonja tohorunja nadrobnosće.

Adwentne popołdnjo w Drježdžanach

Serbske ekumeniske adwentne popołdnjo w Drježdžanach budže sobotu, 29. nowembra, w rumnosćach při cyrkwi swjateho Hubertusa na Běłym jelenju, Am Hochwald 2, 01324 Drježdžany. Započatk je z nyšporom w 15.00 hodź. Přizamknjetej so bjesada a swačina. Zdobom předstaji Smolerjec kniharnja wuběr svojich wudaćow.

Putniske jězby do Erfurta, sewjerneje Němskeje a Awstriskeje

Na tři jězby přeprošuje Radworske Šmitec-Schwarzec wozydłownistwo klětu w běhu lěta. Prěnja powjedže wot pjatka do wutory, 26. do 30. junija, na pasionske hry do awstriskeho St. Margarethena. Nimo toho poskićuja kołoježby. Klětuša serbska putniska jězba pod hesłom „Wěra zetka hudźbu“ budže wot pónđzele do štwórtka, 10. do 13. awgusta. W Erfurće wopytaja wobdžělnicy mjez druhim klóšter awgustinow a tamniši měšniški seminar. Dale wobdžěla so na Erfurtskich domowych swjedženskich hrach, hdžež předstaja klětu musical „Jesus Christus Superstar“. Zdobom zarjaduje Drježdžansko-Mišnjanske bis-kopstwo klětu wot srjedy, 30. septembra, do njedzele, 4. oktobra, chórowe putnikowanje do Greifswalda, Stralsunda kaž tež na kupu Usedom. Dny wobsahuja zhromadne proby a Bože služby. Tam liča z něhdže 250 sobuskutkowacymi. Přizjewjenja přijimuje Šmitec-Schwarzec wozydłownistwo, telefonowe čisło (03 59 35) 28 60.

Ekumeniski nyšpor před něhdyšim bunkrom

W Tuchorskim lěsu wotměje so pokutny džeń, srjedu, 19. nowembra, w 10.00 hodź. dwurěčny ekumeniski nyšpor před jednym z něhdyšich bunkrow. Wšitcy zajimcy su wutrobnje přeprošeni. Srjedź Hornjeho Wujězda wotbočiš do směra na Wulki Wosyk (Großhänchen). Něhdže 500 metrow za Wujězdom podaš so na pólny puć naprawo do Tuchorskeho lěsa. Čara wjedže nimo tamnišeje hěty. Něhdže 200 metrow za njej maš wótrje naprawo wotbočić. Wottam je parkowanišćo widžec. Pod www.posol.de je čara na karće wozjewjena.